



## ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐԱԿԱՆ ԴԱՏԱՐԱՆ

### ԴԱՏԱԿԱՆ ԿԱԶՄԻ ՈՐՈՇՈՒՄ

### ԱՆՀԱՏԱԿԱՆ ԴԻՄՈՒՄԻ ԸՆԴՈՒՆԵԼԻՈՒԹՅԱՆ ՎԵՐԱԲԵՐՅԱԼ

Քաղ. Երևան

17 հուլիսի 2019 թ.

Հայաստանի Հանրապետության սահմանադրական դատարանի  
դատական կազմը՝

Նախագահությամբ՝

Ա. Գյուլումյանի

Անդամակցությամբ՝

Ա. Խաչատրյանի

Հ. Նազարյանի

Քննության առնելով Ռուզաննա Տեր-Վարդանյանի անհատական դիմումի  
ընդունելիության հարցը,

### Պ Ա Ր Զ Ե Ց.

1. Ռուզաննա Տեր-Վարդանյանը 2019 թվականի հուլիսի 8-ին դիմել է Սահմանադրական դատարան՝ խնդրելով. «Մարդու իրավունքների պաշտպանի» մասին ՀՀ Սահմանադրական օրենքի 19-րդ հոդվածի 4-րդ մասը համարել ՀՀ Սահմանադրության 37-րդ հոդվածի 2-րդ մասին, 52-րդ հոդվածին հակասող՝ հաշվի առնելով նաև հոդվածի այդ մասին իրավակիրառ պրակտիկայում տրված մեկնաբանությունները»:

2. Դիմողը գտնում է, որ «Պաշտպանն իր «անկախության երաշխիքի» անվան տակ խախտում է նաև երեխայի շահերի առաջնահերթ ուշադրության արժանացման

ՀՀ Սահմանադրության 2-րդ գլխի 37-րդ հոդվածի 2-րդ մասի իմպերատիվ պահանջները՝ պատճառաբանելով, որ իր անգործությունն անբողոքարկելի է»:

Դիմողը պատճառաբանում է, որ «եթե Պաշտպանի անգործությունը հնարավոր չէ բողոքարկել», ուրեմն «անձը զրկվում է նաև Մարդու իրավունքների պաշտպանի աջակցությունից ...»:

3. Ելնելով դիմումի և կից փաստաթղթերի ուսումնասիրությունից և ղեկավարվելով «Սահմանադրական դատարանի մասին» սահմանադրական օրենքի 29 և 69-րդ հոդվածների պահանջներով՝ Սահմանադրական դատարանի դատական կազմը գտնում է, որ սույն անհատական դիմումի հիման վրա գործի քննությունը ենթակա է մերժման՝ դիմումն ակնհայտ անհիմն լինելու հիմքով, քանի որ դիմումում բացակայում են Սահմանադրության 37 և 52-րդ հոդվածներում ամրագրված սահմանադրական իրավունքների ենթադրյալ խախտման և վիճարկվող նորմերի հակասահմանադրականության միջև պատճառահետևանքային կապի մասին հիմնավորումները:

Այսպես, բացակայում է պատճառահետևանքային կապը Սահմանադրության 37-րդ հոդվածի 2-րդ մասում ամրագրված՝ իրեն վերաբերող հարցերում իր շահերն առաջնահերթ ուշադրության արժանանալու՝ երեխայի իրավունքի և Մարդու իրավունքների պաշտպանի որոշումների անբողոքարկելիության միջև:

Սահմանադրության 52-րդ հոդվածում ամրագրված՝ Մարդու իրավունքների պաշտպանի աջակցությունը ստանալու իրավունքի և Մարդու իրավունքների պաշտպանի որոշումների անբողոքարկելիության միջև նույնպես բացակայում է պատճառահետևանքային կապը՝ հաշվի առնելով նաև այն հանգամանքը, որ Մարդու իրավունքների պաշտպանը դիմումում բարձրացված հարցերի վերաբերյալ որոշում է կայացրել: Դիմումում ներկայացված մյուս փաստարկները ներկայացնում են դիմողի դժգոհությունը Մարդու իրավունքների պաշտպանի ենթադրյալ անգործությունից:

Ինչ վերաբերում է դիմողի այն դիրքորոշմանը, որ Մարդու իրավունքների պաշտպանի որոշումների անբողոքարկելիության պայմաններում իմաստազրկվում է Մարդու իրավունքների պաշտպանին դիմելը, ապա, նախ՝ դիմողը կատարում է վերացական սահմանադրական վերահսկողությանը բնորոշ հարցադրում՝ չհանդիսանալով վերացական սահմանադրական վերահսկողության սուբյեկտ, և երկրորդ՝ մարդու իրավունքների պաշտպանության առավել հուսալի և արդյունավետ եղանակը դա-

տական պաշտպանությունն է, և իր ենթադրյալ խախտված իրավունքների պաշտպանության հարցով դիմողը զրկված չէ անմիջականորեն դատարան դիմելու իրավունքից:

Ելնելով վերոշարադրյալից և ղեկավարվելով «Սահմանադրական դատարանի մասին» սահմանադրական օրենքի 29-րդ հոդվածի 1-ին մասի 6-րդ կետով և 69-րդ հոդվածի 5-րդ մասով՝ Սահմանադրական դատարանի դատական կազմը

### **Ո Ր Ո Շ Ե Ց .**

Ռուզաննա Տեր-Վարդանյանի անհատական դիմումով գործի քննության ընդունումը մերժել:

Նախագահող՝  
Անդամներ՝



17 հուլիսի 2019 թվականի  
ՍԴԴԿՈ-40